

কে আমারে যেন এনেছে ডাকিয়া, এসেছি ভুলে ।
 তবু একবার চাও মুখপানে নয়ন তুলে ।
 দেখি ও নয়নে নিমেষের তরে সে দিনের ছায়া পড়ে কি না পড়ে,
 সজল আবেগে আঁখিপাতা-দুটি পড়ে কি চুলে ।
 ক্ষণেকের তরে ভুল ভাঙায়ো না, এসেছি ভুলে ।
 ব্যথা দিয়ে কবে কথা কয়েছিলে পড়ে না মনে,
 দূরে থেকে কবে ফিরে গিয়েছিলে নাই স্মরণে ।
 শুধু মনে পড়ে হাসিমুখখানি, লাজে বাধো-বাধো সোহাগের বাণী,
 মনে পড়ে সেই হৃদয় উচ্ছাস নয়নকূলে ।
 তুমি যে ভুলেছ ভুলে গেছি, তাই এসেছি ভুলে ॥
 কাননের ফুল এরা তো ভোলে নি, আমরা ভুলি ।
 এই তো ফুটেছে পাতায় পাতায় কামিনীগুলি ।
 চাঁপা কোথা হতে এনেছে ধরিয়া অরুণকিরণ কোমল করিয়া,
 বকুল ঝরিয়া মরিবারে চায় কাহার চুলে ।
 কেহ ভোলে কেউ ভোলে না যে, তাই এসেছি ভুলে ॥
 এমন করিয়া কেমনে কাটিবে মাধবীরাতি ।
 দখিনবাতাসে কেহ নাহি পাশে সাথের সাথি ।
 চারি দিক হতে বাঁশি শোনা যায়, সুখে আছে যারা তারা গান গায়—
 আকুল বাতাসে, মদির সুবাসে, বিকচ ফুলে,
 এখনো কি কেঁদে চাহিবে না কেউ আসিলে ভুলে ।

Parjaay: Prem, Taal: Dadra, Raag: Mishra-Paraj

Visit www.geetabitan.com for notation and other detail